

EBERI JACOB
Genesis 27:41-46; 28:1-22
ỌYỌHỌ UKPEP-ŃKPỌ 23 – Eke Mkpawara

IKỌ IBUOT: “Nyesio mme akaña mi nnọ Jehovah” (Psalm 116:14).

Esau akasua eyen eka esie Jacob koro enye ọkọbode itie akpan esie. Ndusuk, owo ekeme ndinyene mbom mbaña Esau koro kpukpru ńkpọ eketakde enye, edi okoto ke ndudue esie. Ekeme ndidi ama odu ńkpọ ke uwem Esau emi akayatde Abasi esit, koro Enye ọkọdohode Cain ete, “Afo akpanam eti ńkpọ, nte (iso) ikpeneñekede fi? Edi munamke eti-ńkpọ, idiok-ńkpọ ke ana ke enyin usuñ” (Genesis 4:7). Ekeme ndidi Esau ọkọbọ utip idiok-ńkpọ esie. Idem usua ke esit esie ke abaña Jacob ama anam enye akabare edi owot owo, kpa nte nnyin ikekpepe ke ukpep-ńkpọ emi ikenyenede ke edem, edieke owo asuade eyen ete esie, enye amakabare edi owot owo (Matthew 5:22; 1 John 3:15).

Spirit Usio Usiene

Iyaresit ama asak nte ikañ ke esit Esau, ndien enye ebire ndiwot eyen-eka esie. Nte ededi, koro enye okosuk enyenede ukpono ọnọ ete ye eka esie, enye ebire ndibet tutu ete ye eka esie ema ekpa.

Rebekah ama okop mme ikọ emi Esau eketiñde, ndien ọsọsọp ańwam Jacob. Enye ọdohọ Jacob ete afiak etiene oruk imọ ke Haran tutu ifiopesit Esau ọsuhode. Enye ikekereke ite ke enye eyedu do osim isua edip ye kiet, ke akpanikọ enye ọkọdohọ abaña edidu esie ete edidi “ndusuk usen.” Edi enye ikoduhe uwem ikut Jacob aba; enye ama ọbọ ufen ńko ke ediomi esie ndibiaña Isaac ye Esau.

Esau ama ọdọ iban iba emi ekedide nditọ Canaan, emi ekedide ńkpọ iyaresit ọnọ Isaac ye Rebekah. Emi ama ọnọ enye isọñ ndidohọ Isaac ete ke akpana Jacob aka Haran man akada ńwan ọnọ idem esie ke otu oruk imọ. Isaac ama okut ete ekikere oro ọfọn, onyuñ osio Jacob ọdohọ ye edidiọñ emi okokponde akan eke akpa. Enye ọdohọ ete, “Ndien Enye (Abasi) ada edidiọñ emi Enye ọkọdidiọñde Abraham ọnọ fi.”

Abasi ama anam eńwọñọ ọnọ Abraham ete ke iyenam enye akabade edi akamba idut, ndien ke edito oruk esie kpukpru idut ererimbot ekut ufọn. Emi ekedi ntiñ-nnim ikọ nte ke Jesus eyedi usen kiet oto ke oruk Abraham, man ọdidiọñ kpukpru owo emi edibuotde idem ye Enye. Eńwọñọ emi Abasi ekebemde iso anam ye Abraham ọtọñọ ndiwut idem nsit-nsit ndien nnyin ke ibe iduk ọyọhọ emana ita, oro edi Abraham, Isaac ye Jacob.

Esau okosuk enyenyene idorenyin ete ke iyekut mbom ito ete ye eka esie: ke ntak emi ke enye ama okokop nte Isaac ọdohode Jacob ete okuda ńwan ke otu idut Canaan, enye oyom nte enemde mmọ esit ke nditọñọ ntak ndọ ńwan efen, isañ emi, adiaha Ishmael emi mikedighe eyen Canaan. Emi ikosioho enye ke ndudue emi enye ekeduede, ndien nnyin imotim ifiok ite ke enye ikenyeneke emem inọ ukpọñ esie ke ndinam oro.

Utibe Ndap

Jacob ama ọtọñọ isañ esie ke akpanikọ ndifehe mbọhọ eyen eka esie. Ke utit akpa usen, enye ọsuhode ana ndide idap, ndien Abasi owut enye ndap emi akananam enye mikwe. Enye okut eberi emi okosimde ke Obio Abasi ndien mme angel edodok, esọsuhore ke esit. Abasi onyuñ ada ke enyọñ ndien enye onyuñ etiñ ikọ ọnọ Jacob ndisọñọ enye idem ete ke mme edidiọñ emi Isaac ọkọnọde enye enyene ndiworo nsu. Abasi ama ọńwọñọ ndinọ enye isọñ emi akanarede enye okuk, ndien nditọ esie ke emana eke edidide eyewak nte ntan ke isọñ (Mmọ oro edi mme Jew mfin emi).

Abasi onyuñ ọńwọñọ ọnọ Jacob, ńko ete ke Imọ iyedu ye enye ke kpukpru ebiet eke enye edikade, ndien ke iyenyuñ ida enye ifiak. Ke mme isua emi edide ke iso, Jacob ama enyene ntak ndikere mbaña mme eńwọñọ oro. Ke mme ukpep-ńkpọ ifań ke iso, nnyin iyekpep ibaña mkpọsọñ ini emi enye akasañade ebe, edi Abasi ikonyuñ ikpọñke enye, ndien ke akpatre ama ada enye afiak ọsok ete esie.

Mme Angel Ukpeme

Nte ikpedighe utibe ńkpọ ndikut nte mme angel edokdedok enyuñ esuhorede nte emi Jacob okokutde ke ndap esie? Nnyin imenyene mme utọ angel oro, okposuk edi nnyin mikemeke ndikut mmọ. Paul etiñ abaña mmọ ete, “Nte mmọ kpukpru idighe mme spirit emi esañade utom, emi esiode edohọ mmọ ete, enam ńkpọ enọ mmọ emi edidade erinyaña inyene?” (Mme Hebrew 1:4). Ke Psalm 34:7 nnyin ikot “Angel Jehovah ana akan mmọ eke ebakde Enye okuk, onyuñ ańyaña mmọ.”

Ini kiet ke Akani Ediom, Elisha, etiñ ntiñ-nnim-ikọ okodu ke obio emi udim ekọñ ekekande ekuk. Ndik ama anam eyen ufọk esie, enye onyuñ ofiori ete, “Ahah, ete mi, nnyin idinam ididie?” Edi Elisha ọdọhọ enye ete, kufehe ndik koro mbon ekọñ emi edude ye nnyin ewakde ekan mmọ emi edude ye mme asua. Ndien Elisha ọbọñ akam ete yak Abasi atat eyen ufọk imọ enyin spirit. Nte ikedighe ñkpọ mkpaidem inọ enye ndikut obot ọyọhọde ye mme horse ye mme chariot ikañ emi ekande mmọ ekuk, emi Abasi ọkọdọñde man ekpeme mmo! (2 Ndidem 6:14-17). Mme angel Abasi ke ekpeme nditọ Abasi; ndien edieke nnyin iyakde ofuri mbuotidem nnyin idori ke Enye, inyuñ idude uwem ndinem Enye esit, nnyin inyeneke ndifehe ndik ke se ededi emi owo ekemede ndinam nnyin.

Ke ini Daniel okodude ke obube mme ekpe, Abasi ọkọdọñ angel ete okokubi mme ekpe inua. Ñwed Abasi idọhọke ite ke Daniel ama okut angel oro, edi ama ọfiok ete ke enye do, koro enye eketiñde ọnọ edidem usuñ nte ekesañade enyaña enye.

Ke Iso Abasi

Ke ini Jacob ekedemerere ke idap, enye ama okop ndik. Nso idi ntak emi afo ekerede ete Jacob ama okop ndik ke ini enye okokutde ndiye angel edọkde ke Obio Abasi enyuñ esuhọrede ke isọñ, onyuñ okopde nte Abasi ọñwọñde akakan edidiọñ emi akanade ọnọ enye? Ntak ekedi koro idiok-ñkpọ ama odu ke esit Jacob. Enye okonyuñ efehe ọkpọñ Esau koro ndik akanamde enye; ndien idaha emi enye okodu ke iso Abasi, ndien ọkpọsọñ ndik ọdọdiọñ odoro enye.

Abasi ọkọñwọñ ọndinọ enye mme utibe edidiọñ man ediom emi Enye okodiomide ye ete-ete Jacob, Abraham okposu. Iduhe baba ñkpọ kiet emi Jacob akanamde man enye okpodot ndibọ mme edidiọñ oro.

Mme Utibe Eñwọñ

Abasi ama ọñwọñ ọndinọ kpukpru owo idara ke esit mmọ, emem ke ufọt owo ye owo, udia nte ekemde ndidia, ọfọñ ndisine ye ebiet iduñ (Ñwed Mbon Philippi 4:19); ndien nte akakan utip, nsinsi uwem ke utọ utibe heaven emi nnyin mikemeke ndifiok. Ke akpanikọ, akananam owo inamke ñkpọ ndomo kiet emi odotde ndibọ utọ mme edidiọñ oro; edi mbọm Abasi ada mmọ ọsọk nnyin, ndien eyenam mmọ ewọrọ esu ke uwem kpukpru mmọ emi eyakde idem enọ Enye. Edi owo eke ọwọñorede esit esie ọkpọñ Abasi idibọhọ ñkpọ efen ibọhọke ufen.

Mme Akaña Jacob

Jacob ke emi okut ete imọ idi anam idiok, edi ke ndo-ndo oro enye ama oyom ndinam ñkpọ. Enye ama abak edemere, emen itiat owuk, onyuñ ọtọhọ aran ke esit ebeñe idem ndikpono Abasi. Enye ọdọhọ ete, “Ke akpan Jehovah odu ke ọtọ emi; ndien ami mfiokke.” Ọfọñ didie ndituak ibuot nnọ Abasi ke ebiet emi Enye odude!

Jacob ama anam mme akaña ke usenubok oro emi akadade ukpuhọre esin ke uwem esie. Ke ini edem, enye akada kpukpru se enye okokutde ọnọ idem esie, inyuñ ikereke ibaña mbon efen, idaha emi enye onyime Abasi ada enye usuñ. Ñkukure se enye ekebeñede ekedi udia eke ekemde, ọfọñ nte ekemde, ọkọrọ ye enye ndifiak nnyọñ ke ufọk ete esie ke ifure. Utọ ñkabade esit oro ekeme ndida itie ke owo ama akamana obufa, enyaña enye esio ke mme idiok-ñkpọ esie ebe ke iyip Jesus. Ke ndiyak uwem esie nnọ Abasi, enye onim idem esie ke itie emi ekemede ndibọ mme edidiọñ emi Abasi ọkọñwọñde.

Jacob ñko ama akaña tọñde ke ini oro ndikpe ọyọhọ ubak duop. Enye okoyom ndisio ubak kiet ke ñkpọ duop ke kpukpru se enye enyenede nnọ Jehovah. Nnyin imokut nte enye ọdọhọde ete, “Ke kpukpru se Afo edinọde mi.” Enye ikoyomke aba ndida mme ñkpọ nnọ idem esie, edi ọkọbuot idem ke mbọm Abasi ndinọ enye se enye okoyomde ke ini iso. Nnyin iyekpep nte Abasi ọkọdiọñde Jacob ke ediyak idem esie nnọ, ye nte ekenọde enye utip ke ñkpọ ikpohidem ye eke spirit.

MME MBUME

1. Eketie Esau didie ke idem ke ini enye okokopde ete ke ete esie ama ọnọ Jacob edidiọñ?
2. Nte edidiọñ oro ama etiene Jacob nte eketiñde edian enye?
3. Nso ke Jacob akada anam udoribuot?
4. Nso ikedi akaña Jacob?
5. Nte odot nnyin mfin ndikpe ọyọhọ ubak duop?